



SUMÁRIU KAZU | VIOLÉNSIA BAZEIA BA JÉNERU

Agostu 2013

Iha fulan Agostu 2013, Unidade Justisa ba Feto (*Women Justice Unit*) kontinua monitoriza kazu violénsia bázeia ba jéneru iha Jurisdisaun Tribunál Distritál Díli.

Iha edisaun ne'e, sei sumárizá julgamentu kazu hamutuk 3 ne'ebé partensia ba Tribunál Distritál Díli. Sumáriu ne'e limitadu tanba iha inisiu fulan Agostu 2013, tribunál sira tama iha feriadu judisiáriu durante semana rua.

Husi kazu 3 ne'e, kazu 1 kona-ba violasaun seksuál, kazu 1 nu'udar kríme ofensa ba integridade fízika simples ho natureza violénsia doméstika no kazu 1 kona-ba abuzu seksuál ba menór.

Kazu sira ne'e maiória konklui ho alegasaun finál husi Ministériu Públiku no Defensór hodi hein desizaun tuir orariu ne'ebé mak tribunál determina.

Tuir mai deskrisaun sumáriu julgamentu kazu ida-idak:

1. Violasaun seksuál-Númeru Prosesu: 124/2013/TDD

Juis : Dr. Duarte Tilman
: Dr. Jose Maria de Araújo
: Dra. Julmira da Silva
Ministériu Públiku : Dr. Vicente Britis
Defensór Públiku : Dr. Jose da Silva
Ofisial Justisa : Julio Ribeiro
Konkluzau : Julgamentu kontinua fali 5 Setembru 2013.

Iha 22 Agostu 2013 Tribunál Distritál Dili, hala`o prosesu julgamentu hodi rona alegasaun hasoru arguidu L ne'ebé prátika kríme abuzu seksuál ba menór hasoru lezada CdN. Kazu ne'e akontese iha Distritu Ermera.

Ministériu Públiku akuza katak iha 2013, lezada ba to'os atu hamos rai (hamos dut). Iha momentu ne'ebá arguidu lao tuir lezada nia kotuk, arguidu buti lezada nia kakorok, taka lezada nia ibun, riba ba rai no obrigatoriamente halo relasaun seksuál ho lezada.

Ministériu Públiku akuza arguidu kontra artigu 172 Kódigu Penál kona-ba violasaun seksuál .

Iha alegasaun finál, Ministériu Públiku husu ba tribunál atu fó pena prizaun tinan 7. Iha parte seluk, defeza husu ba tribunál atu fó pena ne'ebé justu ba arguidu.

Depois rona tiha alegasaun husi parte sira, tribunál marka fali julgamentu ba 5 Setembru 2013, hodi rona desizaun finál.

2. Ofensa ba integridade fizika simples ho natureza violéncia doméstika-Nú. Prosesu: - 0194/2013/TDDIL

Juis : Dra. Jacinta Correia da Costa
Ministériu Públiku : Dr. Jose Elu (Prokuradór estajiadu)
Defensór Públiku : Dr. Jonas Henrique Costa (Defensór estajiadu)
Ofisial Justisa : Julio Nunes.
Konkluzau : Kontinua fali ba 6 Setembru 2013

Iha 29 Agostu 2013, Tribunál Distritál Díli hala'o julgamentu ba kazu ofensas ba integridade fizika simples ne'ebé komete husi arguidu FSV hasoru nia konjuje MGL. Kazu ne'e akontese iha Distritu Dili.

Ministériu Públiku akuza katak, iha 5 Jullu 2010, arguidu basa dala ida iha lezada nia hasan sorin karuk no tuku iha vítima nia matan fukun sorin loos. Aktu ne'e rezulta lezada monu ba rai no lezada nia kabun baku ba kadeira sofa no vítima sofre moras iha kabun kidun.

Depoide monu tiha arguidu kontinua foti ai-kabelak atu baku, maibé lezada nia tiu mak satan netik tiha no hadau tiha ai-kabelak ne'e. Kazu ne'e akontese tanba lezada husu xave motor iha arguidu atu ba loja, maibé arguidu la fó tanba lezada grávida (isin rua) hela, maibe lezada sisi (ezije) nafatin, tanba ne'e arguidu halo ofensa ne'e ba lezada.

Bazeia ba faktu hirak ne'e, Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuja ho artigu 2, 3 alinea (d) no artigu 35 Lei Kontra Violéncia Doméstika.

Iha audiéncia arguidu hili direitu nonook tuir artigu 60 Kódigu Prosesu Penál. Iha parte seluk lezada deklara katak arguidu basa no tuku dala ida iha nia matan fukun parte karuk.

Iha alegasaun finál, Ministériu Públiku husu ba tribunál atu suspende pena no defeza husu ba tribunál fo pena ne'ebé justu.

Depois rona tiha alegasaun husi parte sira, tribunál marka fali ba 6 Setembru 2013 hodi rona desizaun finál.

3. Abuzu seksuál ba menor-Nu 70/2013/TDD

Juis : Dr. Antoninho Gonsalves
: Dr. Paulo Duarte Texeira (Juis Internasionál)
: Dra. Jacinta Corea da Costa
Ministériu Públiku : Dr. Nelson de Carvalho
Defensór Públiku : Dr. Titania Sequera Lemos (Defensór Internasionál)
Ofisial Justisa : Julio Nunes.

Konkluzau : Kontinua fali iha 10 Setembru 2013

Iha 22 Agostu 2013, Tribunál Distritál Díli hala'o julgamentu ba kazu violasaun seksuál ne'ebé komete husi arguidu JM hasoru lezada TMP. Kazu ne'e akontese iha Distritu Ermera.

Ministériu Públiku akuza katak iha tinan 2011, lezada nia inan-aman ba igreja, arguidu ba sosa brinjela iha lezada nia uma no iha momentu ne'ebá lezada mesak deit. Iha momentu ne'ebá arguidu amiasa lezada no halo abuzu seksuál ba lezada.

Tuir mai iha 27 Marsu 2012, wainhira lezada mesak iha uma arguidu kontinua amesa lezada no halo abuzu seksuál ba lezada.

Ministériu Públiku akuza arguidu ho artigu 177 Kódigu Penál kona-ba abuzu seksuál ba menór konjuga ho artigu 35 número 1 Kódigo Penál kona-ba krime iha konkursu tanba arguidu repete krime ne'ebé mak hanesan.

Iha julgamentu, tribunál halo akareasaun ba lezada ho arguidu, tanba faktus sigundu kontrariu. Iha akareasaun ne'e arguidu no testamuña deklarara katak arguidu ba partisipa iha eleisaun iha data ne'ebé akontese krime. Depois konfirma ba dokumentu husi CNE provadu katak arguidu la partisipa iha eleisaun presidensiál.

Iha alegasaun Ministériu Públiku husu ba tribunál atu kondena arguidu ho pena prizaun 11. Iha parte seluk, defeza husu ba tribunál atu fo pena ne'ebé justu tanba deklarasaun husi parte arguidu ho lezada la han malu.

Depois rona tiha alegasaun finál, tribunál marka fali ba 10 Setembru 2013, hodi rona desizaun finál.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPtl